

## **KDYMM YANG DI-PERTUAN AGONG TITAH DALAMKAN SUNGAI KENAU**

**KUANTAN, 27 JANUARI 2024** : Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Al-Marhum Sultan Haji Ahmad Shah Al-Musta'in Billah bertitah supaya Kerajaan dapat mendalamkan Sungai Kenau di Sungai Lembing.

Seri Paduka Baginda bertitah ia bagi mengelakkan kawasan Sungai Lembing daripada mengalami masalah banjir sekiranya hujan lebat tanpa henti berlaku.

“Paling ketara sekali adalah untuk mencari kaedah supaya banjir ini dapat kita atasi. Tahun demi tahun, bulan demi bulan, apabila hujan lebat bukan hanya menunggu musim tengkujuh tetapi kadang-kadang adakala bila hujan lebat, banjir akan berlaku di sini.

“Mungkin sudah sampai masanya kena kaji, tengok keadaan sungai kita ini. Kaji, tengok, infrastruktur yang ada di sini. Jalan nak capai di sini sudah pun mendap, sungai mungkin dah cetek.

“Saya masih merasakan sungai di Sungai Kenau ini perlu didalamkan. Percayalah, tak guna ada tebatan tapi air dapat melimpah sampai ke bandar (Pekan Sungai Lembing),” titah baginda.

Seri Paduka Baginda bertitah demikian ketika mencemar duli menyantuni 468 mangsa banjir daripada 202 keluarga di Pusat Pemindahan Sementara (PPS) SMK Sungai Lembing.

Turut mengiringi Seri Paduka Baginda, Kebawah Duli Yang Maha Mulia Pemangku Raja Pahang Tengku Mahkota Tengku Hassanal Ibrahim Alam Shah Ibni Al-Sultan Abdullah Ri'ayatuddin Al-Mustafa Billah Shah.

Turut hadir, YB. Setiausaha Kerajaan Negeri Pahang, Dato' Sri Haji Zulkifli Haji Yaacob; dan Ahli Parlimen Paya Besar, YB. Dato' Indera Mohd Shahr Abdullah.

Baginda bertitah supaya projek mendalamkan sungai yang dijalankan di daerah Pekan dapat dijadikan contoh di Sungai Lembing selain meminta pihak berwajib membantu membaikpulih kediaman yang rosak.

“Saya ingin berkongsi sedikit pengetahuan, semasa di Pekan, kita sudah mendalamkan sungai dan Alhamdulillah setakat ini nampak banjir dapat kita kurangkan. Dan mudah-mudahan dapat kita usahakan di sini.

“Dan rumah-rumah ditepi sungai ini perlu ditingkatkan (ditinggikan), buat dua lapis (tingkat). Jangan kita benar (pembinaan) rumah-rumah yang baharu satu lapis (tingkat), elok dicadangkan buat dua lapis.

“Jadi buat masa ini mana-mana rumah yang perlu diperbaiki tolonglah cari sumber-sumber untuk membantu penduduk di sini. Saya nak tengok kawasan ini diselenggara semula. Takkan tiap-tiap bulan kene cuci rumah atau dibaiki semula. Harap dapat diselesaikan dengan segera. Jangan tunggu PRU (Pilihan Raya Umum) sahaja nak janji. Sempurnakan sekarang,” titah baginda.

Seri Paduka Baginda turut memaklumkan Kerajaan Persekutuan telah meluluskan hampir RM100 juta bagi melaksanakan tebatan banjir di negeri ini dan baginda menzahirkan harapan supaya projek tersebut dapat diselesaikan dengan segera bagi memastikan masalah banjir ini tidak lagi berulang. **-PAHANGMEDIA**

Disediakan oleh Unit Komunikasi Dan Media Pahang (UKOMP)

#MajuTerusPahang

#Pahang1st

#KerajaanNegeriPahang

Oleh : Ain Nadhirah Basha

Foto : Putera Faliq Hakim Suhairi

(LIPUTAN BERGAMBAR)



